

पौलाने लिहिलेले तिमथ्यले दुसरे पत्र पौलनी लिखेल तिमथ्यले दुसरं पत्र वळख

दुसरं तिमथ्यनं पुस्तक हाई एक पत्र शे जे प्रेषित पौलनी त्याना शिष्य तिमथ्यीले लिखेल शे, २ तिमथ्य हाई पौलना जिवनना अंत जोडे येल व्हता तवय लिखेल व्हतं. ते तवय लिखाईं गय जवय पौल रोम सरकारना कैदमा व्हता १:१६. पौलना तिमथ्यना संगे जोडेना संबंध व्हतात अनी त्यानी त्याले ह्यामा आपला पोर्या म्हणीसन हाई पत्र लिखेल शे. फिलिप्पै २:२२; १ तिमथ्य १:२; १:१८

हाई त्या चार पत्रसमाधला शे ज्यामा पौलनी एक मंडळीनाबद्दल नही तर व्यक्तीबद्दल लिखेल शे. दुसरा तीन पुस्तके ह्या १ तिमथ्यी, तितस, अनी फिलेमोन. २ तिमथ्यी तवय लिखाईं गयतं जवय रोमी सरकारना येळले ख्रिस्ती लोकसना छळ व्हई राहीता. यानं हाई बी कारण शे की पौल कैदखानामा व्हता अनी तिमथ्यीले संकटसना सामना करना पडी राहीता, १ तिमथ्यना पत्रमा पौलनी खोटा शिक्षकसपाईन सावध रूहावानी तिमथ्यीले चेतावणी देयल शे १ तिमथ्य १:१६-१८ आखो तो तिमथ्यीले अस बी सांगस की, पुढे येणारा काळ भलताच कठीण शे. २ तिमथ्य ३:१

रूपरेषा

१. पौल तिमथ्यीले नमस्कार करीसन सुरवात करस अनी त्याले प्रोत्साहन बी देस. १:१-१८
२. मंग पौल तिमथ्यीले पुढे जावाकरता आव्हान करस. २:१-१३
३. पुढे पौलनी तिमथ्यीले काही सामान्य सुचना देस. २:१४-२६
४. मंग तो त्याले भविष्यमातील घटना अनी योग्य रिततीन प्रतिक्रिया देवाबद्दल चेतावणी देस. ३:१-४:८
५. पौल तिमथ्यीले काही वयक्तीक सुचना दिसन पत्रनी समाप्ती करस. ४:९-२२

1 ख्रिस्त येशुमा जे जिवन शे त्यानाबद्दल देयल वचनना प्रचार कराकरता, देवनी ईच्छातीन धाडेल, ख्रिस्त येशुना प्रेषित पौल ह्याना कडतीन,

२ ✨प्रिय पोरया तीमथ्य याले, देवपिता अनं ख्रिस्त येशु आपला प्रभु यासना पाईन कृपा, दया, अनं शांती राहो.

धन्यवाद अनी प्रोत्साहन

३ ज्या देवनी मना पुर्वजसंपाईन चालत येल सेवा, मी शुध्द विवेक भावतिन करस त्याना मी उपकार मानस, मी मनी प्रार्थनामा रातदिन तुनी आठवण करस.

४ अनी तुना अश्व मनमा लईसन तुले भेटानी भलतीच ईच्छा बाळगस, तुनामा जे निष्कपट ईश्वासनी माले आठवण व्हईसन तुले भेटिसन आनंदीत व्हावाले पाहिजे.

५ ✨तो ईश्वास पहिलीदाव तुनी आजी लुईस इनामा व्हता, तुनी माय युनीके इनामा व्हता, अनी तोच ईश्वास तुनामा शे अशी माले खात्री शे.

६ यानामुये मी तुले आठवण करी देस की, देवनं जे कृपादान मना हात तुनावर ठेवामुये देवनी तुले दिधं.

७ कारण देवनी आपलाले भित्रापणना नही, तर सामर्थ्याना, प्रितीना अनं स्वतःवर ताबा ठेवाना आत्मा देयल शे.

८ यामुये आपला प्रभुबद्दलन्या साक्षनी अनी मी जो त्याना बंदिवान, मनी बी लाज धरू नको तर देवना सामर्थ्याना परिणामतीन सुवार्ताकरता मनासंगे तु बी दुःख भोग.

९ त्यानी आमना कामसप्रमाणे नही तर स्वतःना संकल्पानामायक अनी कृपानामायक आमले तारेल अनं पवित्र पाचारणतीन पाचारण करेल शे, हाई कृपा युगानुयुगना काळना पहिले ख्रिस्त येशु कडतीन आपलावर करामा येल शे;

१० ती आते आपला तारणारा ख्रिस्त येशु ह्याना प्रकट व्हावामुये प्रकाशमान व्हायेल शे, त्यानी मरणले मिटाडी टाकं अनी सुवार्ताना द्वारा सार्वकालिक जिवन अनी अविनाशिता प्रकाशित करेल शे.

११ ✨माले देवना सुवार्तानी घोषणा देणारा प्रेषित अनी शिक्षक अस नेमेल शे.

१२ ह्या कारणमुये मी ह्या दुःख भोगी र्हाइनू तरी मी लाज धरस नही कारण मी ज्यानावर ईश्वास ठेयेल शे, त्याले मी वळखस, तो मनी ठेव* त्या दिनकरता राखाले शक्तिमान शे, असा मना भरवसा शे,

१३ ज्या सुवचनसना नमुना तु मनाकडतीन ऐकी लिधा तो ख्रिस्त येशुमा, सुशिक्षण, तुना ईश्वास अनी प्रिती यासमा दृढपणतीन राख.

१४ आपलामा राहणारा पवित्र आत्माना योगतीन चांगल्या गोष्टी संभाळीसन ठेव.

✨ १:२ १:२ प्रेषित १६:१ ✨ १:५ १:५ प्रेषित १६:१ ✨ १:११ १:११ १ तिमथ्य २:७ * १:१२ १:१२ ठेव शुभवर्तमाननं ज्ञान

15 ज्या आशिया प्रांतमा शेतस त्या मनापाईन फुटेल शेतस, हाई तुले माहितच शे, त्यासमा फुगल अनी हर्मजनेस शे.

16 अनेसिफराना घरवर प्रभु दया करो, कारण त्यानी कायम मनं समाधान करेल शे, अनी मना बेडिनी लाज त्याले वाटनी नही.

17 तर तो रोम शहरमा व्हता तवय त्यानी मेहनत करीसन मी सापडस तोपावत मना शोध करा.

18 प्रभु करो अनी त्या दिनले त्याले प्रभुनी दया मिळो अनी इफिसमा कितलातरी प्रकारमा त्यानी सेवा करी हाई तर तुले चांगलच माहित शे.

2

येशु ख्रिस्तना खरा सैनिक

1 मना पोर्या, प्रभु येशु ख्रिस्तमा जी कृपाद्वारा जी एकता आपलामा शे, त्यामा बलवान व्हत जा.

2 जी शिकवण मना साक्षीदारस समोर मनापाईन ऐकी ती त्या असा ईश्वर माणसले सोपी दे ज्या दुसरासले शिकाडाकरता योग्य शे.

3 ख्रिस्त येशुना चांगला शिपाई ह्या नातातीन मनासंगे दुःख भोग.

4 जो माणुस शिपाई रूहास, तो संसारना कामसमा अडकस नही ह्यानाकरता की ज्यानी त्याले सैन्यमा भरती करी लियेल शे. त्याले त्यानी संतुष्ट करानं.

5 जर कोणी शर्यतमा पळस तर तो नियमप्रमाणे करस नही तर त्याले बक्षिस भेटस नही.

6 श्रम करनारा शेतकरीनी पहिले पिकना वाटा लेवानं योग्य शे.

7 जे मी बोलस ते समजिले, कारण प्रभु तुले सर्व गोष्टी समजाडी दी.

8 हाई मनी सुवार्तानामायक मरेल मातीन ऊठाडेल येशु ख्रिस्त, जो दावीदना वंशमातील शे ह्यानी आठवण ठेव.

9 ह्या सुवार्तामुये मी दुष्कर्म करनारासना मायक बेड्यासनं बी दुःख भोगी रूहायनु तरी देवना वचनले बेडी पडेल नही.

10 ह्यामुये मी निवडेल लोकसले बी ख्रिस्त येशुमातील तारण युगानुयुग गौरव प्राप्त व्हावे पाहिजे म्हणीसन मी त्यानाकरता सर्वकाही धीरतीन सहन करस.

11 हाई वचन ईश्वरसनीय शे की, आपण त्यानासंगे मरणुत तर त्यानासंगे जिवत बी रूहासुत.

12 ✨जर आपण धीरतीन सहन करसु तर त्यानासंगे राज्य बी करसुत. आपण

त्याले नकारसुत तर तो बी आपले नाकारी.

13 जरी आपण अईश्वासी व्हयनुत, तरी तो ईश्वासनीय र्हास कारण त्याले स्वतःविरुद्ध वागता येस नही.

उत्तम कामगार

14 तु ह्या गोष्टीसनी त्याले याद करी दे, त्यासले प्रभुसमोर ताकिद दिसन सांग की, शब्द युद्ध करानं नही. ते कसाना बी उपयोगमा नही पडतस ऐकनारासना नाशना कारण व्हतस.

15 तु सत्यनं वचन निट सांगनारा, लाज वाटेल अस कोणतं बी काम न करनारा, देवना पसंतिले उतरेल कामकरी, असा स्वतःले सादर कराकरता व्हई तितलं कर.

16 अनितीना रिकामी कटकट पाईन दुर र्हाय असा कटकट करनारा अभक्तिमा जास्त वढाई जातीन.

17 अनी ज्यानं शिक्षण उघडी जखमंना मायक व्हई, त्याना मायक हुमनाय अनी फिलेत ह्या शेतस.

18 त्या सत्यना विषयी चुकी जायेल शेतस, पुनस्तथान व्हई जायेल शे अस त्या म्हणतस अनी कित्येकसना ईश्वासना त्या नाश करतस.

19 तर देवनी घालेल स्थिर पाया टिकिसन र्हास त्यावर हाऊ शिकका मारेल शे, प्रभु आपला ज्या शेतस त्यासले वळखस, अनी जो कोणी प्रभुन नाव लेस तो अनितीपाईन वाची र्हास.

20 मोठा घरसमा फक्त सोनाना अनी चांदिना भांडा राहतस अस नही, तर लाकुडना अनी मातिना बी र्हातस, तर त्यासना माधलं कित्येक चांगला कार्यसमा उपयोग करतस, तर काही फक्त कार्यकरता व्हस.

21 म्हणीसन जर कोणी त्यानापाईन दुर र्हाइसन स्वतःले शुद्ध करस तर तो पवित्र करेल स्वामीले उपयोगमा पडनारा, प्रत्येक चांगला कामले उपयोगमा पडनारा मानपाननं भांडं व्हई.

22 तरूणपणना वासनासपाईन दुर पय, अनी शुद्ध मनतिन प्रभुना नाव लेनाराससंगे नितिमत्व, ईश्वास, प्रिती, शांती, ह्यासना मांगे लाग.

23 मुखपणन्या अनी अज्ञानसना वादन्या गोष्टीसपाईन दुर र्हाय, कारण त्यासपाईन भांडणं तयार व्हतस हाई तुले माहित शे.

24 प्रभुना दासनी भांडण नही, तर त्यानी सर्वासनासंगे नम्रमा, सहनशीलतामा अनं शिकाडाकरता तयार रावाले पाहिजे.

25 विरोध करनारासले नम्रतातीन शिकाडनारा असा रूहावाले पाहिजे. कदाचित देव त्यासले सत्यनं ज्ञान व्हावाले पश्चतापनी बुद्धी दी

26 अनी सैताननी त्यासले धरीन ठेवानंतर त्या त्यानापाईन सुटीसन देवनी ईच्छा पुरी कराले शुद्धीमा येतीन.

3

शेवटला दिन

1 हाई समजी ले, शेवटला काळमा कठीण दिन येतीन,

2 कारण माणुस स्वार्थी, पैसासना लोभ धरनारा, बडाईखोर, गर्विष्ठ, निंदा करनारा, माय बापले नही माननारा, उपकारसले नही जाणनारा, अपवित्र,

3 ममताहिन, क्षमा नही करनारा, चुगलखोर, असंयमी, क्रूर, चांगलास बदल प्रेम नही करनारा

4 ईश्वसघात करनारा, गर्वतिन फुगेल, देववर प्रेम करापेक्षा सुखविलासनी आवड करनारा

5 सुभक्तीनं बाहेरनं रूप दखाडीसन तिना स्वतःवर संस्कार नही असा लोकसपाईन बी दुर रहा.

6 त्यानामातिन असा काही लोके शेतस की ज्या घरमा बागेच घुशीसन पापदोषतीन भरेल अनेक प्रकारना वासनानी बहकेल,

7 असा भोळ्या बायासले कायम शिकतस पण सत्यना ज्ञानले कधीच समजु शकस नही.

8 यान्नेस अनी याब्रेस यासनी जसं मोशेले आडावं तसा ह्या माणसे सत्यले आडावतस, ह्या लोके भ्रष्ट बुद्धी व्हायेल अनी ईश्वसबदल अपयशी व्हायेल असा त्या शेतस.

9 तरी बी त्या यानापुढे जावु शकावुत नही. कारण जसं त्यासनं मुखपण उघड व्हायेल शे. तसं यान्नेस अनी याब्रेस यासनासंगे बी व्हयनं.

शेवटनी सुचना

10 तु मना शिक्षणना आचरण, संकल्प, ईश्वस, सहनशीलता, प्रिती, धीर, मना व्हायेल छळ, मनावर येल संकट हाई वळखीन शे.

11 माले अंत्युखियामा, इकुनियोमा, अनी लुच्चात, जे काही व्हयनं अनी मी जो छळ सहन करा ते तु वळखीन शे, त्या सर्वासमातिन माले प्रभुनी सोडायेल शे.

12 ख्रिस्त येशुमा सु-भक्तीतीन आयुष्यक्रम कराले ज्या दखतस, त्या सर्वासना छळ व्हई;

13 अनी दुष्ट, भोंदु मनुष्य, ह्या दुसरासले फसाडिसन अनी स्वतः फशीसन दुष्टपणमा जास्तीच बिघडी जातीन.

14 तु तर ज्या सत्य गोष्टी शिकनास अनी ज्याबद्दल तुनी खात्री व्हयेल शे. ते धरीन रूहाय अनी ते कोणापाईन शिकना

15 अनी धाकलपण पाईन तुले पवित्र शास्त्रनी माहीती शे, हाई माले माहित शे. ते ख्रिस्त येशु मातला ईश्वरासनाद्वारा तुले तारणकरता ज्ञानी कराकरता समर्थ शे.

16 प्रत्येक ईश्वरप्रेरित शास्त्रलेख सदबोध, दोष दखडानं, सुधारनुक, नितीशिक्षण, ह्यानाकरता उपयोगी शे.

17 ह्यानाकरता की देवना भक्त पुरा व्हईसन प्रत्येक चांगला कामकरता तयार व्हावा.

4

1 देव अनी ख्रिस्त येशुना समोर जो जिवतसना, अनी मरेलसना न्याय करी अनी राजा बनीसन राज्य कराले ई त्याले साक्षी मानीसन मी ईनंती करस.

2 तु वचनसनी घोषणा कर, सुवेळी, अवेळी तयार रूहाय सर्व प्रकारना सहनशीलतातीन अनी शिक्षणना दोष दखाडीन निषेध कर अनी बोध कर.

3 कारण अशी येळ येवावं शे की, जवय लोके उपदेश ऐकी लेनार नही, तर आपला कानसले जे आवडस ते पाहिजे म्हणीसन त्या स्वतःना ईच्छातीन आपलाकरता बराच शिक्षकसले गोया करतीन.

4 अनी त्या आपला कान सत्यपाईन फिरावतीन अनी काल्पनिक गोष्टीसकडे लावतीन.

5 तु तर सर्व गोष्टीसबद्दल आत्मनियंत्रण ठेव. दुःख सहन कर, सुर्वातीकनं काम कर, अनी तुले सोपेल सेवा पुरी कर.

6 कारण आते मनं अर्पण कराना अनी जावाना काळ जोडे येल शे.

7 जे सुयुध्द मी करेल शे, पळनं संपाडेल शे, ईश्वरास राखी ठेयल शे,

8 आते राहेल हाईच शे की, मनाकरता निमित्तवना मुकुट ठेयेल शे, प्रभु जो नितीमान न्यायाधीश शे. तो त्या दिन माले तो मुकुट दी. अनी तो मालेच नही तर, त्यानं प्रकट व्हवानं ज्याले प्रिय व्हयेल शे, त्या सर्वासले बी दी.

व्यक्तीगत सुचना

9 तु व्हई तितलं करीसन मनाकडे लवकर ये.

10 ☆कारण देमासले एहिक सुखप्रिय रहावामुये तो माले सोडिसन थेस्सलनीकरासले गया त्रेस्केस गलतीयास अनी तिता दालमतियाले गया.

11 ☆पण लूक मनाजोडे शे, मार्कले आपलासंगे लई ये, कारण तो सेवा कराले माले उपयोगी शे.

12 ☆तुखिकाले मी इफिससले धाडेल शे.

13 ☆मना झगा त्रोवासामा कार्पाजोडे रूहायेल शे, तो येवाना येळले लई ये. अनी पुस्तकं, विशेष करीसन चर्मपत्र बी लई ये.

14 ☆आलेक्सांद्र लोहारनी मनं बरच वाईट करेल शे, त्यानी फेड त्याना कामप्रमानेच प्रभु करी.

15 त्यानाबडलमा तु बी जपीन रूहाय, कारण तो आमना बोलनाले बराच आड येल व्हता.

16 मना पहिला जबाबना येळले मना बाजूले कोणीच नव्हतं, सर्वासनी माले सोडी देयल व्हतं, यानाबडल त्यासना हिशोब लेवामा नही येवो.

17 तरी प्रभु मनाजोडे उभा रूहायना, मनाकडतीन घोषणा पुरी व्हावे पाहिजे, अनी सर्व गैरयहूदीसनी ऐकाले पाहिजे म्हणीसन त्यानी माले शक्ती दिधी, अनी त्यानी माले सिंहना जबडामातीन* सोडावं,

18 प्रभु माले सर्व दुष्ट योजनामातीन माले सोडाई, अनी आपला स्वर्गना राज्यमा सुखरूप लई ई, त्याले युगानुयुग गौरव असो, आमेन.

अंतिम निवेदन

19 ☆प्रिस्किल्ला, अक्विला अनी अनेसिफना घरना लोकसले सलाम सांग,

20 ☆एरास्त करिथमा रूहायना, त्रफिम आजारी पडना, त्याले मिलेतामा ठी वनु.

21 व्हई तितलं करीसन हिवाळाना पहिले ये, युबु अनी पुदेस, लिन, अनी क्लौदिया अनी सर्व भाऊ तुले सलाम सांगतस.

22 प्रभु तुना आत्मासंगे रूहाई, देवनी कृपा तुमनासंगे रूहावो.

☆ 4:10 ४:१० कलससै ४:१४; फिलेमोनले पत्र १:२४; २ करिथ ८:२३; गलती २:३; तिताले पत्र १:४

☆ 4:11 ४:११ कलससै ४:१४; फिलेमोनले पत्र १:२४; प्रेषित १२:१३,२५; १३:१३; १५:३७-३९; कलससै ४:१०; फिलेमोनले पत्र १:२४ ☆ 4:12 ४:१२ प्रेषित २०:४; इफिस ६:२१,२२; कलससै ४:७,८ ☆ 4:13

४:१३ प्रेषित २०:६ ☆ 4:14 ४:१४ १ तिमथ्य १:२०; रोम २:६ * 4:17 4:17 सिंहना जबडामातीन मरणदंडनी शिक्षातीन ☆ 4:19 ४:१९ प्रेषित १८:२; २ तिमथ्य १:१६,१७ ☆ 4:20 ४:२० प्रेषित ११:२२; रोम १६:२३; प्रेषित २०:४; २१:२९

प्रेम संदेश

**The Gospels of Matthew and Mark in the Ahirani
language of India. Ahirani: प्रेम संदेश (Bible)**

copyright © 2023 The Word for the World International and Ahirani Christi
Iswari Mandli, Sakri, Dhule, Maharashtra

Language: अहिराणी (Ahirani)

Contributor: The Word for the World International

प्रेम संदेश

जुना करार, 2025

The Old Testament Books in Ahirani Language

The Word for the World International

This translation is made available to you under the terms of the Creative
Commons Attribution Share-Alike license 4.0.

You have permission to share and redistribute this Bible translation in
any format and to make reasonable revisions and adaptations of this
translation, provided that:

You include the above copyright and source information.

If you make any changes to the text, you must indicate that you did so in
a way that makes it clear that the original licensor is not necessarily
endorsing your changes.

If you redistribute this text, you must distribute your contributions
under the same license as the original.

Pictures included with Scriptures and other documents on this site are
licensed just for use with those Scriptures and documents. For other uses,
please contact the respective copyright owners.

Note that in addition to the rules above, revising and adapting God's Word
involves a great responsibility to be true to God's Word. See Revelation
22:18-19.

2025-07-11

PDF generated using Haiola and XeLaTeX on 10 Jul 2025 from source files
dated 11 Jul 2025

6e2997e4-b06d-5108-bd98-2b3ff67a6f92